

中國史學叢書

鮑照年譜

吳丕績編著

商務印書館發行

中國史學叢書

鮑  
照  
年  
譜

吳丕績編著

商務印書館發行

# 王序

年譜之作。論者以爲始於宋之呂大防。然予讀北堂書鈔。引皇甫士安元晏春秋曰。謚年十七。未通經史。太平御覽亦引十二月乙丑夕。夢至京師。又云。十七年子長七尺四寸。又曰。夏四月。余瘡於河南。皆繫以年月。其年譜之權輿乎。繼知章逢之已言之似非始於宋人矣。其學至近世而寢盛。初不過附庸於文集。後乃蔚爲大觀。知人論世。莫善於此。予嘗謂作譜取材。蓋有二難。一難於過少。一難於過多。少則藉於鉤稽。多則贅於別擇。若汪中之於賈生。蘇輿之於董子。雖極鑽研之功。而所獲至尠。則害於少也。邢彥威王昶之於阿文成。黎庶昌之於曾文正。徒以奏議充塞。阿譜竟至三十餘卷。則害於多也。惟能者爲能以至少擴爲至豐。若孫君隘堪之二妙譜是已。以至多別爲至精。若王懋竑之朱子譜是已。而尤以材少爲難能。昔嘗爲孫君言之。並及作譜所昉。孫君以爲知言。近乃見其弟子吳丕績。偉治江鮑兩譜。自謂翻帙故籍。至三千卷。徵引至數十種。體例略放。顧氏溫公譜。然溫公事實彰著。顧氏猶爲其易。江鮑則史跡無幾。鮑且附於他傳。所存文集。亦非完帙。不績獨能鉤於九幽之中。彙之白日之下。其難易蓋

非顧氏所得同日而語矣。惜乎隘。不能見而論定之也。不績績學能文。亦嘗問業於予。爲喜而序之。如此。民國二十六年三月王遽常序。

# 自序

歲昭陽作噩。余既譜禮陵。旋肇鮑氏。若參軍者。與禮陵並譽江左。文宗儒肆。互居其長。振了麈之才。何慙鴻都。綜蔚宗之學。足溢龍淵。乃南史宋書。略焉不詳。將陽秋待傳左邱。陰符俟揣軒里與。攷厥生平。比蹤光祿。亦事之攸宜者也。用是諷籀詩文。深思辭旨。旁徵吳摯父錢正倫諸賢語。寫精露愚。區年繫月。繼成是譜。庶幾爛錦交披。共賞機雲之句。聯珠並傳。同珍子輿之言。丙子春三月。雲間吳丕續序。

# 鮑照年譜

晉安帝義熙元年乙巳公元四  
百五年

先生一歲

先生名照。字明遠。本上黨人。遷東海。因爲東海人。

不績案。先生卒年幾何。史與虞炎序俱不書。蓋失攷久矣。考先生行路難樂府第七章。陳太初云。宋書少帝景平二年。尙書僕射傅亮。司空徐羨之。領軍將軍謝晦。將謀廢帝。以次第當在廬陵王義真。先奏廢爲庶人。殺之。五月。乃廢帝爲滎陽王。旣而弑之。迎立宜都王義隆。是爲文帝。此詩所爲作也。此云不能言。前章云不敢言。其致一也。史記齊世家。秦滅齊王建。處之松柏之間。餓而死。國人歌之曰。松柏耶。柏耶。住建者客耶。故有但見松柏園之語。又第八章云。宋書五王傳。廬陵王義真。江夏王義恭。衡陽王義季。彭城王義康。南郡王義宣。義真最長而先廢。故云中庭五株桃。一株先著花也。本紀義真以正月被廢。徙新安郡。二月遇害於徙所。故曰陽春妖冶。

二三月隨風簸蕩落西家也。本紀元嘉元年八月詔迎義真靈柩并孫脩華謝妃一時俱還。故云西家思婦見悲惋。零淚沾衣撫心歎也。義真出鎮歷陽表求還都未發而被廢。故言初送我君出戶時。何言淹留節迴換也。牀席生塵明鏡垢。哀其死也。攷少帝及義真之卒。宋書均在元嘉元年。今據陳氏說。則行路難蓋作於元嘉元年。其卒章云。諸君莫歎貧富貴不由人。丈夫四十彊而仕。余當二十弱冠辰。則其時先生年纔二十。今以元嘉元年年二十計。先生當生於義熙元年。下推至泰始二年臨海王敗。先生爲亂兵所殺止。先生享年六十二歲。虞炎序云。年五十餘。五字殆爲六字之誤與。

又案南史臨川烈武傳。鮑照附傳。鮑照字明遠。東海人。虞散騎序云。本上黨人。

陳振孫云。照東海人。云上黨人。

也非

又案。照一作昭。誤。宋子京筆記云。今人多誤鮑照爲鮑昭。李商隱詩云。濃烹鮑昭葵。又金陵有人得地中石刻作鮑照字。潘子真詩話云。景文殊不知武后時諱照。唐人因以昭名之。事具昭

祠堂記。

又案通志氏族志鮑氏似姓。不知所出。或云夏禹之後。有鮑叔仕齊。食采於鮑。因以爲氏。鮑叔字叔牙。進管仲與齊桓公。遂霸諸侯。其後有鮑牽。字莊子。爲夫人聲。孟子所譖。靈公別其足。傳曰鮑莊子之智。不如葵。葵猶能衛其足。齊召鮑國而立之。定九年。陽虎奔齊。請伐魯。鮑文子諫。魯未可取也。世爲齊卿。或云俟力氏改爲鮑。虜姓也。望出上黨東海。然則先生乃俟力氏之後也。

又案晉書地理志。并州有上黨郡。李兆洛地理志韻編云。今山西潞安府潞城縣東北。宋書州郡志。徐州淮陽郡上黨令。本流寓郡併省。來配。地理志韻編云。今闕。按江蘇宿遷縣地。又南兗州北濟陰郡上黨令。地理志韻編云。今闕。當在江蘇境。前條通志旣以鮑姓出上黨東海。先生之上黨。必爲毗連東海者。當屬徐州淮陽郡。

又案宋書州郡志。徐州東海太守。秦郟郡。漢高更名。明帝失淮北。僑立青州於贛榆縣。泰始七年。又立東海縣。屬東海郡。又割贛榆置鬱縣。立西海郡。並隸僑青州。領縣二。去京都水一千陸六百七十。



又案。是年顏延之年二十二。申恬年十八。范曄年七歲。劉義慶年三歲。延之字延年。琅邪臨沂人。性疎淡。不護細行。嘗爲始興王濬後軍參軍御史中丞。文章冠絕當時。其詩則鍾仲偉云。其源出於陸機。尙巧似體裁綺密。情喻淵深。動無虛散。一句一字。皆致意焉。又喜用古事。彌見拘束。雖華秀逸。是經綸文雅才。申恬者字公休。魏郡魏人。臨川王義慶鎮江陵。以爲平西中兵參軍。河東太守。范曄字蔚宗。順陽人。爲始興王濬後軍長史。領南下邳太守。義慶爲長沙景王第二子。幼爲高祖所知。常曰。此吾家豐城也。烈武王薨。義慶嗣。永初元年。襲封臨川王。徵爲侍中。丹陽尹尙書左僕射。歷荆江南兗三州刺史。

二年丙午

四百六

先生二歲

不績案。是年柳元景生。元景字孝仁。河東解人。

三年丁未

四百七

先生三歲

四年戊申四百八

先生四歲

不績案。是年張暢生。暢字少微。吳郡吳人。嘗爲臨川王義慶衛軍從事中郎揚州治平別駕從事史。太子中庶子。

五年己酉四百九

先生五歲

六年庚戌四百十

先生六歲

七年辛亥四一

先生七歲

八年壬子四二

先生八歲

九年癸丑四一  
三

先生九歲

不績案。是年何偃生。偃字仲弘。廬江潛人。爲臨川王義慶平西府主簿。

十年甲寅四一  
四

先生十歲

十一年乙卯四一  
五

先生十一歲

不績案。是年義慶襲封南郡公。

又案。是年王徽生。宋書。徽字景玄。琅邪臨沂人。爲始興王濬後軍功曹記室參軍。其詩鍾氏云。出張華才力苦弱。故務其清淺。殊得風流媚趣。課其實錄。可託乘後車。殷琰生。宋書。琰陳郡長平人。爲始興王後軍主簿。臨海王子頊錄事參軍行郡事。蔡興宗生。宋書。興宗臨海王子頊前

軍長史。南史宋書俱言太豫元年卒年五十八。吳榮光歷代名人年譜作五十九。

十二年丙辰四一

先生十二歲

不續案。是年義慶從伐長安。還爲北青州刺史輔國將軍。未之任。徙督豫州諸軍豫州刺史。將軍並如故。

十三年丁巳四一

先生十三歲

十四年戊午四一

先生十四歲

不續案。是年夏六月。劉裕爲相國。進封宋公。冬十二月戊寅。帝殂。恭帝德文立。

恭帝元熙元年己未四一

先生十五歲

不續案。是年春正月壬辰朔。改元元熙。

宋武帝永初元年庚申<sup>四二</sup>

先生十六歲

不績案。是年夏六月。劉裕卽皇帝位。是爲宋武帝。晉亡。

又案。是年。義慶封臨川王。

二年辛酉<sup>四二</sup>

先生十七歲

不績案。是年謝莊生。宋書。莊字希逸。陳郡陽夏人。初爲始興王濬後軍法曹。先生之友也。嘗與聯句。詩載先生集中。謝詩鍾磔品之云。氣候清雅。不逮於王袁。然興屬閒長。良無鄙促。

三年壬戌<sup>四二</sup>

先生十八歲

不績案。是年夏五月癸亥。武帝殂。太子義符立。明年春正月己亥朔。大赦。改元景平。

廢帝景平元年癸亥<sup>四二</sup>

<sup>三</sup>

先生十九歲

不績案。是年王僧達、王僧綽、蕭惠開、生、僧達、琅邪臨沂人。嘗爲始興王濬後軍參軍。後爲宣城義興太守。與先生頗有倡和。其集已佚。詩品云：征虜卓卓，殆欲度驊騮前。其源出於張華。其宗派蓋與先生同。僧綽、琅邪臨沂人。始興王文學祕書丞。先生集有和王丞詩。蓋卽指僧綽也。惠開爲始興王濬征北府主簿。

文帝元嘉元年甲子四二

先生二十歲

是年。有行路難樂府。

不績案。是年夏六月癸丑。徐羨之等使中書舍人邢安泰弑帝於金昌亭。八月丁酉。義隆卽位。是爲文帝。

又案。先生行路難樂府卒章云：丈夫四十強而仕。余當二十弱冠辰。則是詩是今歲作。宋本鮑集余字作餘。當屬余字之誤。

又案。是詩目標十九首。今集中祇十八。蓋已逸其一矣。

又案。是詩卒章陳太初云。宋書南史臨川王義慶傳。不言明遠年歲。然其貢詩臨川。引列國佐。實在元嘉十載之後。則此行路難作於未遇時者。又在其前。卽所謂嘗爲古樂府。文甚遒麗者也。其當少帝景平之際。元嘉之初乎。詩中惻愴於杜鵑古帝之魂。往日至尊之語。若除廢帝。更無所指。本此以讀全詩。始知富貴不久長之歎。吞聲不敢言之隱。舉非無病之呻。假設之句。若其他章。亦有兼悼廬陵別感放臣之什。故音專骯髒。志乏和平。有激使然。如是則此詩爲今歲所作。益可證明矣。

又案。是年義慶轉散騎常侍祕書監。徙度支尙書。遷丹陽尹。加輔國將軍。

二年乙丑四二五

先生二十一歲

不續案。是年傅亮卒。先生集有贈傅都曹別詩一章。聞人倓注云。傅亮字季友。初爲建威參軍。桓謙中軍行參軍。又爲劉毅記室參軍。攷宋書季友之爲記室。在義熙三四年間。七年遷散騎

侍郎其時先生纔數歲。豈能賦詩贈答。况其傳又不言其爲都曹。則此傳都曹似另是一人。聞氏之說。殆未然歟。

三年丙寅四二六

先生二十二歲

四年丁卯四二七

先生二十三歲

五年戊辰四二八

先生二十四歲

六年己巳四二九

先生二十五歲

不續案。是年始興王濬生。宋書濬字休明。文帝第二子。元嘉十三年封始興王。十七年爲揚州刺史。二十六年爲南兗。徐二州刺史。三十年遷荊州刺史。其年與元凶劭同反。五月世祖入討。



伏誅。

又案。是年四月義慶加尙書左僕射。宋書文帝本紀。六年四月癸亥。臨川王義慶爲尙書左僕射。

七年庚午

四三  
十

先生二十六歲

八年辛未

四三  
一

先生二十七歲

不續案。是年秋八月。義慶解僕射。加中書令。進號前將軍。常侍如故。宋書文帝紀。秋八月甲辰。臨川王義慶解尙書僕射。

九年壬申

四三  
二

先生二十八歲

不續案。是年六月。義慶出爲使持節都督荆、雍、益、寧、梁、南北秦七州諸軍事。平西將軍。荊州刺

史。

十年癸酉四三

先生二十九歲

十一年甲戌四三

先生三十歲

十二年乙亥四三

先生三十一歲

十三年丙子四三

先生三十二歲

不續案。是年九月。濬封始興王。時年八歲。宋書文帝本紀云。九月癸丑立第二皇子濬爲始興王。

十四年丁丑四三

先生三十三歲

十五年戊寅<sup>四三</sup>

先生三十四歲

十六年己卯<sup>四三</sup>

先生三十五歲

時先生欲貢詩義慶。人止之曰。郎位尙卑。不可輕忤大王。先生勃然曰。千載上有英才異士。沈沒而不聞者。安可數哉。大丈夫豈可遂蘊智能。使蘭艾不辨。終日碌碌。與燕雀相隨。於是奏詩。義慶奇之。賜帛二十四匹。尋擢爲國侍郎。甚見知賞。見南史照本傳先生有解褐謝侍郎表。

不續案。先生貢詩義慶。出於何時。史不書。但據宋書。臨川王義慶在江州。招聚文學之士。近遠必至。吳郡陸展。東海何長瑜。鮑照等。並爲辭章之美。引爲佐史國臣。則先生貢詩約在是時。

又案。據虞炎先生集序。先生曾兩爲侍郎。一在臨川王義慶幕。一在始興王濬幕。今觀解褐謝侍郎表云。臣孤門賤士。操無爛迹。鶉棲草澤。情不及官。不悟天明廣囑。騰滯援沈。是始仕語也。

當作於今歲。

夏四月。義慶移鎮江州。先生從之。

不續案。文本紀。是年夏四月丁巳。平西將軍臨川王義慶爲衛軍將軍江州刺史。其傳云。改授散騎常侍。都督江州之西陽。晉義熙新蔡三郡諸軍事。江州刺史持節如故。

又案。宋書州郡志。江州刺史晉惠帝太康元年。分揚州之豫章。鄱陽。廬陵。臨川。南康。建安。晉安。荊州之武昌。桂陽。安城十郡爲江州。初治豫章。成帝咸康六年。移治潯陽。庾悅又治豫章。尋還潯陽。領郡九。縣六十五。戶五萬二千二十三。口二十七萬七千一百四十七。去京都水一千四百。

又案。先生集有登廬山。登廬山望石門。及從登香爐峰詩三篇。其第三篇黃晦聞注云。宋書臨川王義慶在江州。招聚文學之士。近遠必至。太尉袁淑。文冠當時。義慶在江州。請爲衛軍諮議參軍。其餘吳郡陸展。東海何長瑜。鮑照等。並爲辭章之美。引爲佐史國臣。此篇蓋先生從義慶登香爐峰作也。辭宗謂當時文學之士。視屈宋爲盛。歌頌義慶。比之魯侯。其時義慶以江州刺

史都督南兗、徐、兗、青、冀、幽六州諸軍事。一若魯侯之保有鳧繹也。鳧繹二山名。元和郡縣志。鳧山在兗州鄒縣東南三十八里。繹山在鄒縣南二十里。杞梓喻人才之盛。謂歌頌義慶比之魯侯之保有鳧繹。然未若茲山爲羽人之宅。羅景沾光。爲可記也。攷宋書文帝本紀。義慶自今歲夏四月。詔鎮江州。至明年十月。改督南兗。其間相距十有九月。先生從登廬山。當在此十數月中。又有凌烟樓銘。原注云。宋臨川王起序。中有東臨吳甸。西眺楚關之語。則此樓起於江州。作此銘亦在此時。

又案。宋書文帝本紀。是年二月丁未。以始興王濬爲湘州刺史。閏八月戊申。又爲南豫州刺史。本傳云。是年都督湘州諸軍事。仍遷使持節都督南豫、司、雍、并五州諸軍事。南豫州刺史將軍如故。

又案。先生登雲陽九里埭詩。旣成雲雨人。悲緒終不一。黃晦聞云。應德璉侍五官中郎將建章台集詩。欲因雲雨會。濯翼陵高梯。良遇不可值。伸眉路何階。本傳言。始嘗謁義慶。未見知。此篇或卽當時作也。攷義慶自元嘉九年出鎮荊州。其間先生似無進謁之機。豈義慶出鎮荊州。

時進謁耶。否則安有不謀近職而迢迢千里遠適荆土者。况義慶之招聚文學。亦不自荆州始乎。

十七年庚辰<sup>十四</sup>

先生三十六歲

是年九月二十七日。葬元皇后於長寧陵。

不續案。宋書文帝記。是年九月壬子。葬元皇后於長寧陵。顏延之哀策文云。九月二十七日。

十月義慶以本號爲南兗州刺史。先生隨焉。還京都。省家。道出京口。從拜陵。登京峴。有上潯陽還都道中。還都至三山望石頭城。還都口號。行京口竹里。從拜陵登京峴等詩。

不續案。宋書文帝本紀。是年十月戊寅。臨川王義慶以本號爲南兗州刺史。義慶傳云。卽本號都督南兗州。徐兗青冀幽州諸軍事。南兗州刺史。尋加開府儀同三司。

又案。宋書州郡志。南兗州刺史。中原亂。北州流民多南渡。晉成帝立南兗州。寄治京口。時又立南青州及并州。武帝永初元年省并。併南兗。文帝元嘉八年。始割江淮間爲境。治廣陵。永初郡

國領十四郡。南高平、南平昌、南濟陰、南濮陽、南泰山、濟陽、南魯山郡。今並屬徐州。又有東燕郡。

江左分濮陽所立也。領燕縣。前漢曰南燕後漢曰燕並屬東郡太康地志屬濮陽白馬、平昌。考城凡四縣。文帝元嘉十八

年考城併燕。十九年省東燕縣。屬南濮陽。後又省東燕郡。南東平郡領范、蛇丘、歷城凡三縣。高

密郡領淳于、黔陬、營陵、夷安凡四縣。南齊郡領安西、臨菑凡二縣。南平原郡領平原、高唐、茌平

並別見凡三縣。濟岷郡。江左立領營城、晉寧。江左凡二縣。雁門郡。漢舊郡領慶煩。別見陰館。前漢作觀後漢晉作館也

廣武。前漢屬太原後漢晉太康地志屬雁門也崞、馬邑。並漢舊名凡五縣。凡七郡二十三縣。並省屬南徐州。諸僑郡縣。何

志又有鍾離、雁門、平原、東平、北沛五郡。鍾離今屬徐州。雁門領樓煩、陰館、廣武三縣。平原領茌

平、臨菑、營城、平原四縣。東平原領范、朝陽、歷城三縣。沛領符離、蕭、相、沛四縣。符離漢舊縣餘並別見凡十

四縣。起居注。元嘉十一年。以南兗州東平之平陸併范。壽張併朝陽。平原併濟岷。晉寧併營城。

先是省濟岷郡為縣高唐併茌平。按此五縣。元嘉十一年所省。則平陸、壽張擬在永初郡國志而無此二

縣未詳。徐志有南東平郡。領范、朝陽、歷城、樓煩、陰觀、廣武、茌平、營城、臨菑、平原十縣。則是雁門、

平原併東平也。孝武大明五年。以東平併廣陵。宋又僑立新平、北淮陽、北濟、北下邳、東莞五郡。

元嘉二十八年南兖州徙治盱眙。三十年省南兖州，併南徐。其後復立，還治廣陵。徐志領郡九縣三十九，去京都水二百五十，陸一百八十。

又案繆彥威先生鮑譜云：按詔臨川王徙鎮南兖州，在十月戊午，爲初三日。據陳媛庵二十四史朔閏表而

明遠詩中所云：寒律驚窮蹊，潮上冰結洑。夜分霜下淒。還都道中第二首鉦歌首寒物，歸吹踐開冬。還都

口冰閉寒方壯。行京口竹里從軍乏衣糧。方冬與家別。發後渚皆明言初冬，故此數詩殆皆一時所作。

也。又曰：上潯陽還都道中詩。五臣注以爲明遠爲臨海王參軍，從荊州還所作。方植之辨之曰：子頊以拒命死，其幕僚尙敢還都乎？五臣之注，昧於事理矣。吳摯父云：此蓋從臨川王義慶赴

江州時作也。古謂到官爲上，此臨川王上潯陽，非鮑上官也。按此詩亦明遠從臨川王由江州移南兖時所作。五臣注之誤，方氏辨之已明。吳說亦未審。此詩起句云：昨夜宿南陵，今旦入蘆洲。南陵在潯陽之東。文選集釋引胡氏曰：六朝時江州東界盡於南陵，蓋謂江津要處，非今之南陵縣。義熙六年，盧循攻建康不克，南還潯陽，留其黨范崇民據南陵。據此可知。若由荊州赴江州，無由宿南陵，且亦不應曰還都道中。又案此詩文選題爲還都道中，毛斧季校宋本鮑集



作潯陽還都道中。皆無上字。則上字容或有誤。不然亦不必拘拘解爲上官之上也。此詩蓋初發潯陽時作。

又案。繆譜云。還都至三山望石頭城詩。有遊子遲見家之句。一統志三山在江寧府西南五十七里。下臨大江。三峯排列。故名。發後渚詩。有方冬與家別之句。古詩選聞人倓注。後渚在建業城外江上。可知是時明遠之家殆居於建康也。

又案。明遠有瓜步山揭文云。鮑子辭吳客楚。指竟歸揚。疑亦爲還都赴竟時所作。

又案。先生從拜陵登京峴詩。黃晦聞曰。元和志。永寧陵在丹徒縣東南三十五里。宋武帝父翹追尊曰孝皇帝陵也。宋書后妃列傳。孝穆趙皇后生高祖。殂於丹徒官舍。葬縣東鄉練壁里。雩山。宋初追崇號謚陵曰興寧。孝懿蕭皇后與興寧陵合墳。武帝胡婕妤生文帝。葬丹徒陵。曰熙寧。以上諸陵皆在丹徒。當時拜陵之禮。見之文帝紀者。元嘉四年二月行幸丹徒。謁京陵。則其禮復舉。本詩從拜陵登京峴屬孟冬十月。疑卽元嘉十七年九月二十七日葬元皇后於長寧陵時作。長寧陵卽顏延之哀策文所謂南背國門。北首山園者。亦在丹徒。哀策序云。皇帝親臨

祖饋躬瞻宵載。羣臣相從。策文所謂僕人按節。服馬願轅。明遠禮畢而登京峴。故曰孟冬十月交也。

又案。讀史方輿紀要云。京峴山在丹徒縣東五里。一名丹徒峴。相傳卽秦時所鑿以泄王氣處。鎮江志云。此爲京山。又西南五里爲峴山。

又案。江乘地記曰。城東四十五里竹里山。王塗所經。甚傾險。行者號翻車峴。

又案。吳摯父曰。明遠有登大雷岸與妹書。與上潯陽還都詩。旨同。則此文或亦爲是時作。

十八年辛巳一四四

先生三十七歲

十九年壬午二四四

先生三十八歲

不續案。是年范曄爲始興王後軍長史。

二十年癸未三四四

先生三十九歲

不績案。是年王徽卒。年二十九。本傳何長瑜卒。見謝靈運傳。

二十一年甲申四四

先生四十歲

是年春正月戊午。臨川王義慶薨。先生上書世子。自解侍郎。有通世子自解及重與世子啓文二篇。

不績案。宋書文帝本紀。是年正月戊午。衛將軍臨川王義慶薨。本傳言年四十二。

又案。先生自解啓。題書世子。此世子蓋指臨川王義慶子也。集中野鵝賦序有臨川世子等語。可證。宋書義慶傳。義慶有子六人。及薨。子哀。王燁南史作曄。嗣。先生此啓。當爲上燁者。其辭曰。自奉

清塵。於茲六祀。蓋先生自元嘉十六年從義慶江州。至今已六載矣。又曰墜辰永往。遺恩在心。執紙哽咽。是指臨川之薨而言也。

又案。先生集野鵝賦序云。有獻野鵝於臨川王。世子愍其樊繫。命爲之賦。此篇當作臨川生前。

又案是年江淹生。

二十二年乙酉五四

先生四十一歲

十二月丁酉。彭城王義康免爲庶人。先生感賦春羈詩。

不續案。書文帝紀。元嘉二十二年十二月丁酉。免大將軍彭城王義康爲庶人。

又案。黃晦聞春羈詩注云。明遠此詩。殆傷彭城王義康之廢也。詩託興於馬。證之晉書愍懷太

子傳。先是有童謠曰。東宮馬子莫鬻空。前至臘月纏汝髮。或亦詩意之所取。謂春正暄妍。而馬

多摧抑。其嘶聲可召堅邊。我獨傷之。不爲潘岳書草作箱中之紙也。晉書愍懷太子傳。賈后將廢太子。使黃門侍郎潘岳

作書草。若禱神之文。令小婢承福。以紙筆及書草。使太子書之。太子之廢也。至許遺妃書云。有一小婢持封箱來。云詔使寫此文。書鄙便驚起視之。有一白紙一青紙。催促云。陛下停待。又小

婢承福持筆研墨。黃紙來使寫。急疾不容復視。實不覺紙上語輕重。

又案。先生從過宮詩。錢振倫謂舊宮在彭城。攷宋書衡陽王義季傳。元嘉二十二年進督豫州

之梁郡。遷徐州刺史。此或爲其所辟從之之任耶。

又案是年范曄卒年四十八。

二十三年丙戌四四

先生四十二歲

是年臨川王服竟秋先生歸田有還田里詩和王丞詩及代苦熱行各一章時始與王又引為侍郎先生有拜侍郎疏。

不續案吳摯父曰義慶元嘉二十一年薨服竟在二十三年自十七年是十六鎮江州至此始

八年詩云捨耨將十齡豈鮑隨臨川王不自江州始耶抑未遇義慶已離田里詩併數之耶竊

謂詩言捨耨將十齡乃舉成數不必泥蓋將字本未滿之意也此詩為元嘉二十三年吳摯父以

為二舊君宜服三年喪也按儀禮喪服為舊君服齊衰三月宋書禮志魏世或為舊君服三年者至晉泰始四年尚書何楨奏故辟舉綱紀吏不計違適皆反服舊君齊衰三月於是詔書下

其奏所適無貴賤悉同依古典則自晉泰始以後即依古典行三月喪宋世當仍其制故臨川王薨明遠服三月之喪服竟還鄉此詩應作於元嘉二十一年

又案先生還田里詩云愴愴秋風生戚戚寒緯作則先生作詩返里蓋在秋間。

又案先生和王丞詩乃和王僧綽也吳摯父注云宋書王僧綽以元嘉二十六年為尚書吏部

郎此詩在元嘉二十六年以前作。蓋臨川服竟歸田里時也。繆彥威先生鮑譜云宋書王僧綽傳僧綽初爲始興王文學秘書丞

司徒左長史太子中庶子以元嘉二十六年徙尙書吏部郎故此詩至晚當作於二十五年之前蓋僧綽爲始興王文學時明遠爲國侍郎同在王府遂相款洽故僧綽轉爲秘書丞有此唱

和之作吳攀父謂此詩作於臨川服竟歸田里時非也

又案代苦熱行朱桓堂樂府正義曰宋文帝元嘉二十三年遣交州刺史檀和之討林邑宗慤

自請從軍和之遣慤爲前鋒遂克林邑陽邁父子挺身走所獲未名之寶不可勝計慤一無所

取還家之日衣櫛蕭然此刺功高賞薄戈船伏波蓋指和之及慤也

又案虞炎先生集序云王薨臨川義慶始興王又引爲侍郎

又案先生拜侍郎疏云鍛羽暴鱗復見翻躍枯楊寒炭遂起烟華當是再爲侍郎之作先生自

臨川薨後自解侍郎至是而再起故有此語

又案先生從庾中郎遊山石室詩吳攀父云庾中郎庾永也元嘉二十二年除竟陵王誕北中

郎錄事參軍宋書永獵涉書史能爲文章善隸書曉音律騎射雜藝元嘉二十三年造華林園

玄武湖并使永監統凡諸制署皆受於永此園山石室卽華林園所造也又吳興黃浦亭庾中

郎別詩亦云。庾中郎。庾永也。此詩亦元嘉二十二年作。二十三年庾已徙官江夏王中兵參軍。是後不得仍稱中郎。攷南史宋書。吳氏所云俱屬張永之事。非庾永也。聞人倖以爲是庾悅。亦非。宋書庾悅爲中郎。一在晉元興二年。桓元篡逆。徙中書侍郎。一在劉裕定京邑時。武陵王遵承旨以悅爲寧遠將軍。安遠護軍。武陵內史。以病去職。鎮軍府版咨議參軍。轉車騎從事中郎。劉毅請爲撫軍司馬。不就。是時先生蓋尙未生。

二十四年丁亥四七

先生四十三歲

是年二月戊戌。河濟俱清。先生上河清頌。

不續案。南史宋書臨川王傳鮑照附傳云。元嘉中。河濟俱清。當時以爲美瑞。先生河清頌序云。聖上天飛踐極。迄茲二十四載。又宋書符瑞志云。文帝元嘉二十四年二月戊戌。河濟俱清。龍驤將軍青冀。二州刺史杜垣以聞。

又案。是年衡陽王義季薨。年二十三。

又案先生見賣玉器詩。錢楞仙注云。前臨川王服竟還田里詩。顧此謝人羣。豈直止商洛。遇銅山掘黃精詩。空守江海思。豈懷梁鄭客。合之此詩所云我方歷上國。從洛入函轅。是明遠實有遊洛之迹。攷宋書衡陽王義季傳。元嘉二十一年爲都督南兗。徐。青。冀。幽。六州諸軍事。征北大將軍。開府儀同三司。南兗州刺史。二十二年進督豫州之梁郡。遷徐州刺史。二十四年薨于彭城。豈義慶旣薨。明遠卽依義季。故前有征北世子誕育上表。從之梁。旋從之徐。故復有從過舊宮之詩。又春羈詩。黃晦聞云。明遠此詩殆傷彭城王義康之廢也。詩託興於馬。證之晉書愍懷太子傳。先是有童謠曰。東宮馬子莫聾空。前至臘月纏汝髮。或亦詩意之所取。謂春正暄研而馬多摧抑。其嘶聲可召堅邊。我獨傷之。不爲潘岳書草。作箱中之紙也。宋書衡陽王義季傳。自彭城王義康廢後。遂爲長夜之飲。略少醒日。則義康之廢。衡陽已傷之。錢注旣疑明遠曾依衡陽。節證之宋書戴顓傳。衡陽王義季鎮京口。顓爲義季鼓琴。並新聲變曲。則本詩收句。君子字。當指顓言。益可爲明遠依衡陽之證。若然。則先生自臨川薨後。曾參衡陽幕乎。然先生有臨川服竟歸田里詩。是則先生往依衡陽。應在臨川服竟時。當元嘉二十三四年間。而虞序所謂



始興王引爲侍郎則在元嘉二十六年。始興王出鎮京口時矣。其間一年卽南史所云文帝以爲中書舍人時歟。

又案宋書臨川烈武傳照附傳云元嘉中河濟俱清照爲河清頌世祖以爲中書舍人上好爲文章自謂人莫能及照悟其旨爲文多鄙言累句虞序亦云孝武初除海虞令遷太學博士兼中書舍人時主多忌以文自高照侍左右深達風旨以此賦述不復盡其才思獨南史則繫之文帝疑文帝爲世祖之誤世祖孝武也孝武雄猜故先生深自抑制恐見嫉媚文帝宋之賢主似不致此。

二十五年戊子四四八

先生四十四歲

二十六年己丑四四九

先生四十五歲

冬十月甲辰始興王爲征北將軍南徐兖二州刺史出鎮京口先生從之。

不續案。宋書文帝本紀。是年冬十月甲辰。以中將軍揚州刺史始興王濬爲征北將軍開府儀同三司。出鎮京口。聽將文武二千人自隨。優遊外藩。甚爲得意。

又案。宋書州郡志。南徐州丹徒令。本屬晉陵。古名朱方。後名谷陽。秦改曰丹徒。孫權嘉禾三年。改曰武進。晉武帝太康三年復曰丹徒。元和志云。建安十三年孫權自吳徙治丹徒。曰京城。十六年遷建業。復於此置京口鎮。水經注云。京口丹徒之西鄉也。又曰京城。

又案。先生蒜山被始興王命作。黃晦聞云。明遠此詩當是濬鎮京口時命作。則是詩蓋作於今後數年中。又詩起句云。暮冬霜雪嚴。地閉泉不流。則又爲暮冬所賦者矣。

又案。文選李善注。蒜山在潤州西二里。劉楨京口記曰。蒜山無峰。嶺北臨江。顧氏讀史方輿紀要云。蒜山在鎮江府西三里江岸上。山多澤蒜。因名。或云吳周瑜與諸葛武侯謀拒曹操於此。因曰算山。

二十七年庚寅<sub>四五</sub>

先生四十六歲

是年有送別王宣城詩。

不續案。先生送別王宣城詩。吳摯父云。僧達爲臨川王義慶之壻。其爲宣城太守。在元嘉二十七八年間。僧達求解職表云。賜濫宣城。仲春移任。方冬便值虜南侵。是元嘉二十七年也。攷先生詩云。旣逢青春盛。復值白蘋生。蓋用禮記季春之月萍始生語。是與宣城解職表所云仲春移任辭旨相同。則是詩作於本年。蓋可知矣。

二十八年辛卯<sub>四五</sub>

先生四十七歲

不續案。宋書文帝本紀。是年三月壬辰。征北將軍始興王浚南兗州。

二十九年壬辰<sub>四五</sub>

先生四十八歲

是年有和王義興僧達學陶彭澤體詩一章。秋有詩和王義興七夕。

不績案。先生送別王宣城詩。吳摯父注。僧達求解職表云。賜蒞宣城。仲春移任。方冬便值虜南侵。是元嘉二十七年。又云宣城民庶詣闕見請。還務未期。亡兄見背。賜帶郡還都。曾未淹積。復除義興。案僧達再蒞宣城。在元嘉二十八年。表云還務未期。則去任在二十九年。則僧達爲義興。當自今歲始。至明年二月元凶劼弑逆世祖。入討時奔世祖止。則和義興七夕詩。應屬今歲。其和義興學陶彭澤一章。亦爲是時所作。

又案。僧達七夕月下詩云。遠山斂霧縵。廣庭揚月波。氣往風集隙。秋還露滋柯。節期旣已屏。中宵振綺羅。來歡詎終夕。收泪泣分河。

又案。代白紵舞歌詞章并啓。及白紵曲二章。啓曰。侍郎臣鮑照啓。被教作白紵舞歌詞。謹竭庸陋。裁爲四曲。應作於始興。從逆前。或爲臨川國侍郎時。姑誌於此。以待考焉。宋書樂志。白紵舞。按舞詞有巾袍之言。紵本吳地所出。宜是吳舞也。晉俳哥。又云。皎皎白緒。節節爲雙。吳音呼緒爲紵。疑白紵卽白緒。南齊書樂志。白紵歌。周處風土記。吳黃龍中。童謠云。行白者君。追汝句驪馬。後孫權征公孫淵。浮海乘泊。泊白也。今歌和聲。猶云行白紵焉。吳兆宜玉台新詠注。引樂府

解題云。古辭盛稱舞者之美。宜及芳時爲樂。其譽白紵曰。質如輕雲。色如銀。製以爲袍。餘作巾。袍以光軀。巾拂塵。唐書樂志云。梁武令沈約改其辭爲四時白紵歌。今中原有白紵曲。其旨與此全殊。

三十年癸巳<sub>四五</sub>

先生四十九歲

是年春正月壬午。始興王爲荊州刺史。時元凶劭弑逆。始興從謀。

不續案。宋書文帝本紀。是年春正月壬午。以征北將軍南徐州刺史始興王濬爲衛將軍。荊州刺史。本傳云。徙都督荆、雍、益、梁、寧。南北秦七州諸軍事。衛將軍開府。儀同三司。領護軍。南蠻校尉持節常侍如故。

又案。宋書孝武紀云。元嘉三十年正月上。出次西陽之五州。會元凶劭弑逆。以上爲征南將軍加散騎常侍。上率衆入討。荊州刺史南譙王義宣。雍州刺史臧質。並舉義兵。

五月丙申。始興王以從謀伏誅。先生作中興歌十章。

不續案。孝武紀之五月丙申。克定京邑。劭及始興王濬諸同逆並伏誅。

又案。宋書孝武本紀云。元嘉三十年五月克京城。改新亭爲中興亭。先生中興歌十章。當作於是時。

是月。柳元景爲雍州刺史。侍宴覆舟山。奉敕作詩。先生代成二章。

不續案。先生覆舟山詩。黃晦聞注云。按題下敕爲柳元景作。蓋元景侍宴世祖。奉勅作詩而明遠代爲之作也。宋書柳元景傳。世祖入討元凶。以爲諮議參軍。領中兵。加冠軍將軍。太守如故。配萬人爲前鋒。元景潛至新亭。依山建壘。東西據險。上至新亭卽位。以元景爲侍中。領左衛將軍。轉使持節。監雒。梁。南北秦。四州。荊州之竟陵。隨。二郡諸軍事。前將軍。寧蠻校尉。雒州刺史。蓋其時奉勅作也。攷孝武本紀。柳元景爲雒州刺史。在是年五月戊子。據黃氏說。此詩爲今年五月作。

又案。孝武遊覆舟山詩云。束髮始怡衍。弱冠頗流薄。素想終勿傾。聿來果丘壑。層峯亘天維。曠渚綿地絡。逢臯列神苑。遭壇樹仙閣。松磴含青暉。荷源煜彤爍。川界泳遊鱗。巖庭響鳴鶴。時孝

武年方二十四。

又案寰宇記覆舟山在建康城北五里。周圍三里。高三十一尺。狀如覆舟。因以爲名。讀史方輿紀要云。在江寧府北太平門內。舊志在府北七里。形如覆舟。因名山脈東連鍾山。北臨玄武湖。一名龍山。宋元嘉中嘗改名曰元武山。陳大建中又改爲龍舟山。

又案是年王僧綽卒。年三十一。宋書二凶傳云。元凶卽位。三月僧綽以預先廢立見誅。本傳云。時年三十一。

又案是年春二月甲子帝殂。夏四月己巳。世祖駿立。是爲孝武帝。明年春正月乙亥朔。改元孝建。

孝武帝孝建元年甲午四五

先生五十歲

是年。先生除海虞令。

不續案。虞炎先生集序云。孝武初。除海虞令。先生爲海虞令。約在是時。

又案。宋書州郡志。揚州吳郡太守海虞令。晉武帝太康四年分吳縣之西鄉立李兆洛歷代地理志韻編云。今江蘇蘇州府常熟縣東。

又案。先生自孝武初至大明四年間。凡三遷其職。一爲海虞。一爲秣陵。一爲永嘉。依漢書段令宗傳如淳注。邊吏三歲一更例之。先生自今歲除海虞。越三年當孝建三年。遷太學博士兼中書舍人。出爲秣陵令。又三年當大明三年。遷永嘉令。又三年當大明六年。除臨海王前軍行參軍。前後頗相符。此雖臆斷。要亦相去不遠也。

又案。是年謝莊拜吏部。向柳卒。

二年乙未<sub>四五</sub>

先生五十一歲

是時先生在海虞任。

三年丙申<sub>四五</sub>

先生五十二歲



冬十月爲柳令作謝驃騎表。

不續案。先生有侍宴覆舟山詩二首。勅爲柳元景作。則此柳令當卽指元景。元景之爲驃騎。據宋書孝武本紀云。孝建三年十月丁未。領軍將軍柳元景加驃騎將軍尙書令。此表蓋是時作也。

先生遷太學博士兼中書舍人出爲秣陵令。約在是年。有謝表。

不續案。代放歌行吳摯父曰。明遠有侍郎報滿辭閣疏。蓋在此時。史云爲中書舍人。舍人疑侍郎之誤。史云世祖以爲中書舍人。世祖孝武也。孝武雄猜。故詩意及之。與史正同。

又案。宋書州郡志揚州秣陵令。其地本名金陵。秦始皇改本治。去京邑六十里。今故治村是也。晉安帝義熙九年移治京邑。在鬪場。恭帝元熙元年省揚州府禁防參軍。縣移治其處。

又案。先生集中有謝秣陵令表。自注時爲中書舍人。

又案。翫月城西廡中詩。文選五臣注云。時爲秣陵令。當爲是時所作。

又案。詩又有月下登樓連句。稱鮑博士。大約是年所作。連句有王延秀。荀原之。荀中書萬秋。

是年。又作蕪城賦。

不續案。何義門云。世祖孝建三年。竟陵王誕據廣陵反。沈慶之討平之。命急誅城內男丁。以女口爲軍賞。照蓋感事而賦也。

又案。是年海陵王子頊生。宋書本傳云。字烈。武帝第七子也。初封歷陽王。後改封臨海王。位荊州刺史。明帝卽位。進督雍州。長史孔道存不受命。應晉安王子助。事敗。賜死。時年十一。

又案。是年謝莊坐疾。辭吏部尙書。王僧達除太常。

又案。是年申恬卒。年六十九。顏延之卒。年七十三。孔平仲續世說。顏延之問鮑照。己與謝靈運優劣。照曰。謝詩如初發芙蓉。自然可愛。君詩若鋪錦列繡。亦彫繪滿眼。鍾仲偉詩品。則謂湯惠休云。謝詩如芙蓉出水。顏如錯彩鏤金。顏終身病之。創鮑休之論。鍾仲偉云。惠休淫靡。情過其才。世遂匹之。鮑照恐商周矣。羊曜璠云。是顏公忌照之文。故立鮑休之論。其事不知出於何年。姑志於此。以存疑云。

大明元年丁酉四七五

先生五十三歲

不續案。宋書孝武本紀。是年春正月辛亥朔。改元大明。

又案。是年張暢卒。年五十。

二年戊戌

四五

先生五十四歲

先生轉永嘉令。約在是年。

不續案。前以漢書注邊吏三年一更計之。先生轉令永嘉。約在今歲。

又案。宋書州郡志。揚州永嘉太守。晉明帝太寧元年。分臨海立領縣五。曰永寧。令曰安固。令曰松陽。令曰樂成。令曰橫陽。令曰嘉慶。一統志浙江志。永嘉縣。漢初爲東甌國。後爲回浦縣地。後漢初爲章安縣地。永和三年。置永寧縣。屬會稽郡。三國吳太平二年。屬臨海郡。晉太寧初。爲永嘉郡治。宋齊以後。因之。

又案。先生集有謝永安令解禁止啓一篇。疑虞序所云永嘉者。是永安之誤。抑先生又嘗爲永

安令耶。

又案。是年王僧達下獄死。年三十六。何偃卒。年四十六。

三年己亥四九

先生五十五歲

不續案。是年謝莊起爲都官尙書。

又案。先生日落望江贈荀丞詩。吳摯父曰。荀伯子及子赤松。均爲尙書。伯子元嘉十五年卒。官東陽太守。明遠蓋尙未出。赤松爲元凶劭所殺。史不言有文學。此荀丞不稱左丞。殆別有人。伯子族弟昶。昶字茂祖。以文藝至中書侍郎。子萬秋。亦用才學自顯。皆無官丞者。不續攷宋書禮志。有大明三年使尙書左丞荀萬秋造五路禮圖。四年正月戊辰。尙書左丞奏籍田儀注等語。則是時萬秋爲尙書左丞。先生所贈。當卽萬秋。是詩當亦是時所作。

四年庚子四六

先生五十六歲

不續案。是年子頊封歷陽王。食邑二千戶。仍爲冠軍將軍吳興太守。孝武本紀云。是年正月庚寅。立第七皇子子頊爲歷陽王。

五年辛丑<sub>四六</sub>

先生五十七歲

不續案。是年九月壬寅。改封歷陽王子頊爲臨海王。

六年壬寅<sub>四六</sub>

先生五十八歲

秋七月。臨海王子頊爲荊州刺史。先生爲前軍行參軍。侍臨海王。非所願也。有從臨海王上荊。初發新渚詩。途經翻車峴。有詩。尋遷前軍刑獄參軍事。

不續案。宋書孝武本紀。是年秋七月庚辰。臨海王子頊爲荊州刺史。虞序云。大明五年。今據本紀。

又案。南史宋書臨川王傳。鮑照附傳云。臨海王子頊爲荊州。照爲前軍參軍掌書記之任。虞序

云除前軍行參軍侍臨海王鎮荊州掌知內命尋遷前軍刑獄參軍事。

又案上荆詩黃晦聞云上荆非先生所願故詞多悲鬱。

又案韻府新渚任金陵。

又案先生登翻車峴詩云淖坂既馬嶺磧路又羊腸黃晦聞注曰續漢郡國志荊州桂陽郡郴有客嶺山注湘中記曰縣南十數里有馬嶺山又南郡夷道注荊州記曰縣東南有羊腸山明遠將客荊州山川所感馬嶺羊腸似當指此。

又案嘉慶一統志江蘇江寧志云竹里山元和志在句容縣北六十里塗甚傾險行者號爲翻車峴山間有長澗高下深阻說者云似洛陽金谷通志六朝時京口至建康皆取道於此。

又案集中有登黃鶴磯詩代陽春登荆山行在江陵歎年傷老在荊州與張使君李居士聯句諸詩當在今歲後作。

又案先生和傅大農與故僚別詩云浮江望南嶽錢楞仙注云史記封禪書上巡南郡至江陵而東登禮灑之天柱山號曰南嶽則此詩似亦爲初發上荆贈別之作但不知傅大農爲何人

耳。

七年癸卯

三四六

先生五十九歲

不續案。是年謝莊免官吏部尙書。案謝氏之爲尙書。一在孝建元年至三年。是吏部尙書。一在大明三年至五年。是都官尙書。一在大明六年至七年。是再爲吏部。先生有與謝尙書莊三連句詩。最遲當作於今歲謝氏免官前。

八年甲辰

四四六

先生六十歲

不續案。是年閏五月庚午。孝武殂。太子子業立。是爲前廢帝。明年正月乙未朔。改元永光。秋八月癸酉。又改爲景和。十一月戊午。壽寂之姜產之弑帝於華林園。明帝踐立。十二月丙寅。改景和爲泰始元年。

又案。先生樂府採桑詩。吳肇父云。孝武宮闈瀆亂。傾惑殷姬。詩殆爲此而作。則是篇作於孝武

之世當在今歲前。

明帝泰始元年乙巳

四六  
五

先生六十一歲

是年十一月前廢帝被弑。先生作代挽歌。代蒿里行。代門有車馬行。

不續案。先生代挽歌。吳摯父曰。韓彭數句。蓋傷廢帝被弑。而無人討賊也。代蒿里行曰。此詩當爲孝武挽歌。天道與何人。蓋爲明帝之弑。廢帝而孝武絕統也。故曰長恨。代門有車馬行曰。故悲蓋謂元凶劬。後感蓋謂廢帝也。末四句卽我聞有命不敢告人之旨。據摯父說。以上諸詩。應屬今歲所作。

又案。錢振倫云。合歧陽守風。發長私過雪。蜀四賢詠數詩觀之。似明遠有由陝入蜀之迹。宋書臨海王子頊傳。前廢帝卽位。以本號都督荆湘雍益梁甯南北秦八州諸軍事。刺史如故。明帝卽位。解督雍州。以爲鎮軍將軍丹陽尹。尋留本任進督雍州。又進號平西將軍。明遠爲其書記。意或隨之行耶。果爾。則數詩當在本年作。



冬十二月。臨海王爲鎮軍將軍徐州刺史。先生從之。

不續案。明帝本紀。是年十二月庚午。荊州刺史臨海王爲鎮軍將軍徐州刺史。

又案。是年八月庚午。柳元景卒。年六十。

二年丙午。四六

先生六十二歲

是年正月。晉安王子勛稱帝。臨海王舉兵應之。先生作代東門行。

不續案。宋書孝武十四王傳。泰始二年正月七日。鄧琬等奉子勛爲帝。卽僞位於尋陽城。

又案。代東門行。吳摯父曰。晉安王子勛之亂。臨海王從亂。明遠爲臨海王前軍參軍。此詩蓋憂亂之愴。

八月子勛敗。荊州治中宋景。土人姚儉等。勒兵入城。先生與典籤阮道豫。劉道憲。同遇害。宋書

不續案。子頊之敗。宋書明帝本紀。是年八月己卯。建安王休仁率衆軍討賊。斬僞尙書僕射袁凱。進討江、郢、荆、湘、雍五州。平晉安王子勛之亂。安陸王子綏。臨海王子頊。邵陵王子元。並賜

死。虞序云。宋明帝初。江外拒命。及義嘉敗。荆土震擾。江陵人宋景因亂掠城。爲景所殺。義嘉者。晉安王僭位年號也。晉安王子勛傳云。泰始二年。鄧琬等奉子勛爲帝。卽僞位於尋陽城。年號義嘉。可證。是則先生之卒。在今年八月。

又案。繆彥威先生鮑譜云。硯北雜誌。鮑明遠墓在蘄州黃梅縣南里許。

又案。先生謝假啓云。終鮮兄弟。仲由所哀。又云天倫同氣。實惟一妹。則先生同產者。祇妹一人耳。至宗族之見於集者。亦祇從弟道秀一人。餘則不可知矣。

又案。先生妹字令暉。有才思。著香茗賦。集行於世。見小名錄。先明遠卒。

繆譜據謝假啓云天倫同氣。實惟一妹。存沒永

訣不獲計。見封塋泉壤。送私懷感。恨情痛兼深。

臨鍾仲偉詩品云。令暉歌詩。往往嶄絕清巧。擬古尤勝。唯百願淫矣。

照嘗答孝武云。臣妹才自亞於左芬。臣才不及太冲爾。今其集亡。玉台新詠有詩七篇。其擬青  
青河畔草云。萋萋臨窗竹。藹藹垂門桐。灼灼青軒女。泠泠高台中。明志逸秋霜。玉顏艷春紅。人  
生誰不別。恨君早從戎。鳴絃慙夜月。紺黛羞春秋。擬客從遠方來云。客從遠方來。贈我漆鳴琴。  
木有相思文。絃有別離音。終身執此調。歲寒不改心。願作陽春曲。宮商長相尋。題書後寄行人

云。自君之出矣。臨軒不解顏。砧杵夜不廢。高門晝常關。帳中流燿燿。庭前華紫蘭。物枯識節異。鴻來知客寒。遊用暮冬盡。除春待君還。古意贈今人。云。寒鄉無衣服。衣氈代文練。月月望君歸。年年不解綰。荆揚春早和。幽翼猶霜霰。北寒妾已知。南心君不見。誰爲道辛苦。寄情如飛燕。形迫杼煎絲。顏落風催電。容華一朝盡。惟餘心不變。代葛沙門妻郭小玉詩云。明月何皎皎。垂櫬照羅茵。若共相思夜。知同憂怨晨。芳華豈矜貌。霜露不憐人。君非青雲逝。飄迹事成秦。妾持一生泪。經秋復度春。其一君子將遙役。遺我雙題錦。臨當欲去時。復留相思枕。題用常著心。枕以意同寢。行行日已遠。轉覺心彌甚。其二寄行人云。桂吐兩三枝。蘭開四五葉。是時君不歸。春風徒笑妾。

又案鍾伯敬名媛詩歸。將玉台近代西曲歌以下一十八章。並列爲令暉所作。而黃晦聞刊先生集。所附令暉詩。祇上述七篇。鍾蓋有誤。今從黃本。

又案先生文。昔人評論。如臨川附傳云。文辭瞻逸。南齊書文學傳云。發唱驚挺。操調險急。雕藻淫艷。傾心炫魂。張皋聞賦鈔序云。以情爲裏。以物爲標。錢彫雲風。琢削支鄂。其懷永而不可忘。

也。全乎其氣。煊乎其華。則謝莊鮑照之爲也。江淹爲最賢。其源出於屈平九歌。其掩抑沈怨。冷輕輕。其蹤脫淨宕。而歸於太常。鮑照江淹。其體則非也。其意則是也。近則興化李審言。丈與隘。堪師書云。太沖三都之後。士衡安任。漸趨今軌。明遠文通。起而振之。藻耀高翔。足稱勅敵。其詩則鍾仲偉詩品云。鮑照詩其源出於二張。善製形狀寫物之詞。得景陽之諷詭。含茂先之靡嫵。骨節強於謝混。驅邁疾於顏延。總四家而擅美。跨兩代而孤出。杜工部詩云。清新庾開府。俊逸鮑參軍。秦少游云。謝靈運鮑照之詩。長於峻潔。何義門云。明遠天才瞻麗。尤長於夸飾。故光燄騰于楮墨之表。又曰。詩至明遠。發露無餘。李杜韓白皆出此也。孫月峯曰。明遠詩氣勁而骨奇。調響而語隋。句含金石。字挾風霜。劉融齋藝概云。孤蓬自振。驚沙坐飛。此鮑明遠賦句也。若移以評明遠詩。頗復相似。又曰。張景陽詩開鮑明遠。明遠驚遁絕人。沈礪士說詩粹語云。鮑明遠樂府。抗音吐懷。每成亮節。代東門行。代放歌行等篇。直欲前無古人。又案鍾仲偉詩品云。鮑照詩其源出於二張。于二張則云。其源出於王粲。于王粲則云。其源出於李陵。而沈約又憲章鮑明遠。是蓋李陵一傳爲王粲。再傳爲張華。張協。三傳爲鮑照。四傳爲

沈約累代師承遙相嬗接李陵一脈其淵源可以考矣。

又案先生身既遇難篇籍無遺流遷人間幾至湮沒賴東儲博采始顯於世考隋書經籍志有

宋征虜記室參軍鮑照集十卷注云梁六卷新舊唐志云鮑照集十卷宋書藝文志云鮑照集

十卷明以來見之邵亭知見傳本書目者有明正德庚午朱應登活字本即四庫著縣之都穆本明汪士

賢刻本明程榮刻本明張溥百三家本明毛季斧校宋本四部叢刊本士禮居影宋抄本持靜室有

顧沅以宋本校汪刻本陽湖孫氏有影寫本系本鮑集原文其餘有錢振倫注文二卷詩四卷本詩有黃節

補注民國癸亥刊行宋本今載文三十七篇奉始興王命作白紵舞曲啓在內詩二百一篇今本文亦三十七篇詩則二

百四篇宋本蓋缺扶風歌一篇懷遠人一篇詠老一篇春詠一篇宋本代淮南王分朱城下爲二篇故詩總數相差祇三首

又案宋本行路難詩目標十九首而詩祇存十八蓋已佚其一

又案文選錄先生文有舞鶴賦蕪城賦二篇詩則咏史一首行藥至城東橋一首還都道中一

首東武行出自薊北間行結客少年場行代君子有所思行東門行苦熱行白頭吟放歌行升

天行樂府各一首數詩學劉公幹體翫月城西廡中各一首擬古三首共十八首玉台新詠錄

翫月城西門廡中。代京雜篇。白頭陰。採桑詩。夢還詩。擬古河畔草未黃。詠雙燕。代淮南王各一首。贈故人馬子喬寒灰滅更燃及雙劍將別離二首。代白紵歌辭朱唇動及春風淡蕩俠思多二首。行路難中庭五株桃。剝蘖染黃絲。奉君金卮之旨酒。及璿閨玉墀上椒閣四首。共十六首。又案。先生所作河清頌及登大雷岸與妹書。文甚工麗。爲世所稱。不識昭明選文。何以不及此。又案。宋書劉穆之傳。劉瑀始興王南徐州別駕。王弘傳。王釗臨海王子瑱晉安王征虜前軍長史。向靖傳。向柳始興王濬征北內史。張邵傳。張悅臨海王前軍長史。孔琳之傳。孔道存臨海王前軍長史。沈曇慶傳。曇慶始興王濬衛軍長史。蔡興宗傳。興宗臨海王子瑒前軍長史。張暢傳。暢臨川王義慶從事中郎。何偃傳。偃臨川王義慶平西府主簿。王微傳。微始興王濬後軍功曹記室參軍。申恬傳。恬臨川王義慶平西中兵參軍。范曄傳。曄始興王濬後軍長史。顏延之傳。延之爲始興王濬後軍諮議參軍御史中丞。殷琰傳。琰始興王濬後軍主簿。臨海王子瑒錄事參軍。謝莊傳。莊始興王後軍法曹行參軍。王僧綽傳。僧綽始興王文學祕書丞。左徒長史。王僧達傳。僧達始興王濬後軍參軍。袁顥傳。顥始興王後軍行參軍著作郎。蕭惠開傳。惠開始興王濬

征北府主簿。徐爰傳。爰始興王後軍。王道隆傳。道隆始興王濬世子師。又臨川義慶傳。太尉袁淑。吳郡陸展。東海何長瑜諸子。並有文辭。爲先生同僚。詩句唱和。定復不少。今集中所見者。惟王僧達。王僧綽。王延秀。荀萬秋。庾中郎。傅都曹。傅大農。盛侍郎。休上人。張使君。李居士。馬子喬諸人。或事跡湮沒。或名字不存。今並誌於此。以待考焉。

又案。先生集有轉常侍疏文一篇。事出何年不可考。但當在爲臨川侍郎後。

又案。嘉慶一統志。安徽廬州府有明遠台。在合肥縣東北梁縣鄉。回環皆水。中有一洲。相傳爲鮑照讀書處。宋張持正卽其地。建俊逸亭。蓋取杜詩俊逸鮑參軍意也。臨邑人黃道周有詩云。崇台開曠面。殘葉集孤清。何事橫洲上。而留鮑照名。淡煙依宿莽。疏雨發長荆。懈葉吟風夜。還疑誦讀聲。

本傳緣自宋書臨川武烈王傳

鮑照字明遠。文辭瞻逸。嘗爲古樂府。文甚遒麗。元嘉中。河濟俱清。當時以爲美瑞。照爲河清頌。其序甚工。其辭曰。臣聞善談天者。必徵象於人。工言古者。先考績於今。鴻臚以降。遐哉邈乎。鏤山岳。彫篆素。昭

德衆勳。可謂多矣。而史編唐堯之功。載格于上下。樂登文王之操。稱於昭于天。素狐玄玉。聿彰符命。朴牛大螾。爰定祥曆。魚鳥動色。禾雉興讓。皆物不盈。皆而美溢金石。詩人於是不作。頌聲爲之而寢。庸非感歎。自我皇宋之承天命也。仰應龍木之精。俯協河龜之靈。君圖帝寶。祭爛瑰英。固業光曩代。事華前德矣。聖上天飛踐極。迄茲二十四載。道化周流。玄澤汪濊。地平天成。上下含熙。文同軌通。表裏禔福。耀德中區。黎庶知讓。觀英遐表。夷貉懷惠。卹勤秩禮。罷露臺之金。舒國振民。傾鉅橋之粟。約違迫脅。奢去泰甚。燕無留飲。畋不盤樂。物色異人。優游據正。顯不失心。幽無怨氣。精炤日月。事洞天情。故不勞杖斧之臣。號令不嚴。而自肅。無辱鳳舉之使。靈怪不召。而自彰。萬里神行。飄塵不起。農商野廬。邊城偃櫓。冀馬南金。填委內府。馴象西爵。充羅外囿。阿紈綦組之饒。衣覆宗國。漁鹽杞梓之利。傍瞻荒遐。士民殷富。五陵既有慚德。宮宇宏麗。三川莫之能比。閭閻有盈。歌吹無絕。朱輪疊轍。華冕重肩。豈徒世無窮人。民獲休息。朝呼韓。罷酤鐵而已哉。是以嘉祥累仍。福應尤盛。青丘之狐。丹穴之鳥。栖阿閣。遊禁園。金芝九莖。木禾六仞。秀銅池。發膏畝。宜以協調律呂。謁薦郊廟。烟霏霧集。不可勝紀。然而聖上猶昧旦夙興。若有望而未至。閔規遠圖。如有追而莫及。神明之貺。推而弗居也。是以琬碑鏤檢。盛典蕪而不治。朝神省



方大化抑而未許。崇文協律之士。蘊儷頌於外。坐朝陪宴之臣。懷揄揚於內。三靈佇睠。九壤注心。既有日矣。歲宮乾維。月躔蒼陸。長河巨濟。異源同清。澄波萬壑。潔瀾千里。斯誠曠世偉觀。昭啓明皇者也。語曰。影從表。瑞從德。此其効焉。宣尼稱鳳鳥不至。河不出圖。傳曰。俟河之清。人壽幾何。皆傷不可見也。然則古人所不見者。今人殫見之矣。孟軻曰。千載一聖。是旦暮也。豈不大哉。夫四皇六帝。樹聲長世。大寶也。澤浸羣生。國富刑清。鴻德也。制禮裁樂。惇風遷俗。文教也。殊華逋羯。束穎絳闕。武功也。鳴鳥躍魚。滌穢河渠。至祥也。大寶鴻德。文教武功。其崇如此。幽明協贊。民祇與能。厥應如彼。唯天爲大。堯實則之。皇哉。唐哉。疇與爲讓。抑又聞之。勢之所覃者淺。則美之所傳者近。道之所感者深。則慶之所流者遠。是以豐功建命。潤色籛策。盛德形容。藻被歌頌。察之上代。則奚斯吉甫之徒。鳴玉鸞於前。視之中古。則相如王褒之屬。施金羈於後。絕景揚光。清埃繼路。班固稱漢成之世。奏御者千有餘篇。文章之盛。與三代同風。由是言之。斯迺臣子舊職。國家通義。不可輟也。臣雖不敏。寧不勉乎。世祖以照爲中書舍人。上好爲文章。自謂物莫能及。照悟其旨。爲文多鄙言累句。當時咸謂照才盡。實不然也。臨海王子頊爲荊州。照爲前軍參軍掌書記之任。子頊敗。爲亂兵所殺。

本傳錄自南史臨川武烈王傳

鮑照字明遠。東海人。文辭瞻逸。嘗爲古樂府。文甚遒麗。元嘉中。河濟俱清。當時以爲美瑞。照爲河清頌。其敍甚工。照始嘗謁義慶。未見知。欲貢詩言志。人止之曰。卽位尙卑。不可輕忤大王。照勃然曰。千載上有英才異士。沉沒而不聞者。安可數哉。大丈夫豈可遂蘊智能。使蘭艾不辨。終日碌碌。與燕雀相隨乎。於是奏詩。義慶奇之。賜帛二十四匹。尋爲國侍郎。甚見知賞。遷秣陵令。文帝以爲中書舍人。上好文章。自謂人莫能及。照悟其旨。爲文章多鄙言累句。咸謂照才盡。實不然也。臨海王子頊爲荊州。照爲前軍參軍。掌書記之任。子頊敗。爲亂兵所殺。

### 虞炎鮑照集序

鮑照字明遠。本上黨人。家世貧賤。少有文思。宋臨川王愛其才。以爲國侍郎。王薨。始興王濬又引爲侍郎。孝武初。除海虞令。遷太學博士。兼中書舍人。出爲秣陵令。又轉永嘉令。大明五年。除前軍行參軍。侍臨海王鎮荊州。掌知內命。尋遷前軍刑獄參軍事。宋明帝初。江外拒命。及義嘉敗。荆土震擾。江陵人宋景因亂掠城。爲景所殺。時年五十餘。身旣遇難。篇章無遺。流遷人間者。往往見在。儲皇博採羣言。遊好

文藝片辭隻韻。罔不收集。照所賦述。雖乏精典。而有超麗。爰命陪趨。備加研訪。年代稍遠。零落者多。今所存者。儻能半焉。

鼂氏郡齋讀書志

鮑參軍集。宋鮑照明遠也。上黨人。世祖以爲中書舍人。後臨海王子項鎮荊州。照爲參軍。子項敗。爲亂兵所殺。初孝武好文。自謂人莫能及。照悟其旨。爲文多鄙言累句。當時謂照才盡。實不然也。事見沈約宋書。而李延壽史乃以世祖爲文帝。集有虞炎序云。爲宋景所害。倘見於他書乎。

張溥題辭

鮑明遠才秀人微。史不立傳。服官年月。考論鮮據。差可憑者。虞散騎奉勅一序耳。明遠松柏篇。自敘危病中讀傅休奔集。見長逝辭。惻然酸懷。草豐人滅。憂生良深。後掌臨海書記。竟死亂兵。謝康樂云。天枉兼常。其斯人乎。臨川好文。明遠自恥燕雀。貢詩言志。文帝矜才。又自貶下就之。相時投主。善用其長。非禰正平楊德祖流也。集中文章。實無鄙言累句。不知當時何以相加。江文通遭逢梁武。年華望暮。不敢以文陵主。意同明遠。而蒙譏才盡。史臣無表而出之者。沈休文竊笑後人矣。鮑文最有名者。蕪城賦。河

清頌。及登大雷書。南齊文學傳所謂發唱驚挺。操調險急。雕藻淫豔。傾炫心魂。殆指是耶。詩篇創絕。樂府五言。李杜之高曾也。顏延年與康樂齊名。私間優劣於明遠。誠心折之士。顧才何如耳。寧論官閥哉。婁東張溥題。

#### 四庫敘錄

鮑參軍集十卷。宋鮑照撰。照字明遠。東海人。晁公武讀書志作上黨人。蓋誤讀虞炎序中本上黨人之語。照或作昭。蓋唐人避武后諱所改。韋莊詩有欲將張翰松江雨。畫作屏風寄鮑昭句。押入平聲。殊失其實。案宋禮部貢舉條式齊桓避諱作齊威。可用於句中不可押入徵韻。沈約宋書。李延壽南北史。作於武后稱制前者。實皆作照。不作昭也。照爲臨川王子頊參軍。沒於亂兵。遺文零落。齊散騎侍郎虞炎始編次成集。隋書經籍志著錄十卷。而註曰梁六卷。然則後人又續增矣。此本爲明正德庚午朱應登所刊。云得自都穆家。卷數與隋志合。而冠以炎序。未審卽隋志舊本否。考其編次。旣以樂府別爲一卷。而採桑。梅花落。行路難。亦皆樂府。乃列入詩中。唐以前人皆解聲律。不應舛互若此。又行路難第七首。蹲蹲字下註曰集作樽樽。啄字下註曰集作逐。使果原集何得又稱集作。此爲後人重輯之明驗矣。然文章皆有首尾。詩賦亦往往有自

序自註。與六朝他集從類書採出者不同。殆因相傳舊本。而稍爲竄亂歟。鍾嶸詩品云。學鮑照纔能日中市朝滿。學謝朓劣得黃鳥度青枝。今集中無此一句。蓋知非梁時本也。

鮑參軍詩注錢序

振倫注樊南文集補編。既付刊。乃從張溥漢魏百三家摘鈔江二家自序。欲爲箋註而未果。緣精力衰頹。又吳制府既去。并借書不可得也。內鮑明遠集。尤所服膺。老不能閒。遇所記憶。輒標識於簡端。積久漸多。塗乙幾無隙地。乃手錄一過成帙。明遠詩文。有見於文選者。卽錄李善注。其詩有見玉臺新詠者。近人吳兆宜有注。有入漁洋古詩選者。聞人倓有注。皆依錄而不沒其名。李善注文選。採用薛綜劉逵諸注。此例固可援引也。考隋書經籍志。唐書藝文志。鮑照集皆作十卷。何義門手批蕪城賦。重江複關之隕。宋刻鮑集作重關複江。則是義門固曾見宋本。今四庫全書所收鮑參軍集十卷通行本則已明人都穆所輯。是紀文達所見。已非宋本。特卷數與隋唐書偶同。不知視宋本所缺幾何。此外有正德庚午朱應登刊本。與都本同。張溥亦明人而所收明遠詩文止二卷。又不知視諸本所缺幾何。魏漢百三家多錄原序。溥知有虞散騎序而不採。亦所未解也。憶昔主講杭州。每求珍笈。輒從文瀾閣借觀。維時

宋本不可得。而通行本尙可得也。今鄉關蹂躪。兵燹摧殘。旣無能問津。間有計偕入都者。屬爲訪諸廠肆。亦杳不可得。徒抱此斷簡殘編。矻矻箋注。夫亦不可以已耶。雖然。樊南文集其初亦從類書掇拾而成耳。自徐馮注出。蒐羅漸富。而振倫從欽定全唐文錄補作注。數乃埒之。蓋成書之不易如此。自今以往。或訪得鮑集完本足成之。則以此爲大輅之椎輪也可。否則爲貧家之敝帚也可。是爲序。同治七年十月歸安錢振倫書於袁浦講舍。

### 鮑參軍詩注張序

順德黃子晦聞。劬聞敦行。學無所不闕。而獨昌於詩。其詩歷宋之後。山宛陵諸家。盡規其度。又浸淫於漢魏六朝古樂被聲之詩。得夫古所謂風者而好之。悉發篋藏。闢幽蟻。創爲之注。融辭金膏。芟擿孔翠。其奧殫李崇賢之於選。其構會甄釋。上探騷辨。旁究蒼雅。顏祕監之於漢書。蓋善詩者。或不善注詩。不善詩者。又或假注詩掩其不善詩。說古之詩如牛毛。求今之詩乃麟角。兩者交相詬。微黃子通其郵。莊嶽庚庚。其僂矣乎。語有之。成康沒。頌聲寢。王澤竭。詩不作。夫詩至於不作。非詩病也。賢人君子。觀世變。知其無所獲益而不作也。玄黃閉。情靈壅。民摯傷。癩抑。至於舉世無詩。舉世歎詩無益而不復作詩。此

其爲世何如世邪。黃子少卓犖。蓋嘗慕陳同甫之爲人。更歷艱虞。韜光沈馨。歌詩百數章。藏弄不輕出。顧獨窮日力。剗古人之詩。而疏淪之。人第驚黃子學之云勤。而不知黃子之志自茲隱已。余知黃子者。曩客北都。無三日不見。見必言詩。今別經時。適鮑詩注成。因序以貽之。異時湖山清夷。煙哦霞謠。吾知黃子且益出其詩。與斯注相鼓吹焉。擎傷癯抑之氣。感而爲沖融澹沱。其諸世之一治歟。癸亥嘉平三月。錢塘張爾田。

## 鮑參軍詩補注黃序

辛酉十二月。余注謝康樂詩既畢。念鮑參軍詩難讀。視康樂過之。繼將作注。與江山劉丈子庚語。丈爲道歸安錢楞仙先生有注稿未刊。藏錢念劬許。竊幸參軍詩。先我作注有人。因丐劉丈轉假諸念劬先生。鈔錄全編。錢注鮑參軍集文二卷。詩四卷。附鮑令暉詩六首。余方在大學說詩。乃獨取詩注理之。既與諸生講習時有所增注。又問采前人論鮑詩諸說附焉。於今二年矣。鮑詩之注。蓋有二難。錢注所據爲張天如本。而宋本已歎未見。今據余昔日鈔存王伊所校宋本及涵芬樓景印毛季斧所校宋本。則知文字譌異。雖宋本亦所難免。代東武吟。倚杖牧雞豚。見之荆公詩。及朱子之言者。宋本則杖牧作仗

族。吳歌。曹公卻月樓。宋本則曹作魯。公作都。月作丹。幽蘭。抱梁輒乖忤。宋本則梁作渠。三日遊南苑。騰  
蒨茂林疏。宋本則騰蒨作勝舊。發後渚。華志分馳年。宋本則分作公。發長松遇雪。土牛旣送寒。宋本則  
土作出。冥陸方泱馳。宋本則冥陸作奠陵。臨川王服竟還田里。送舊禮有終。宋本則舊作佳。喜雨。何用  
知柏皇。宋本則皇作篁。如是者不可勝數。此猶其易知者也。至若園中秋散。復切夏蟲酸。宋本夏作夜。  
代白馬篇。要途問邊急。宋本問作間。採菱歌。含傷捨泉花。宋本捨作拾。則非深理全詩。莫知其誤。蓋自  
唐以來。讀鮑詩者。鮮篇什多佚。文字之譌異。完本旣不可得。諸本校奪。何所適從。况有諸本悉誤者。如  
吳歌。觀見水流還。則亦無從校奪。注者之難。此其一也。參軍生不逢辰。憂危辭多。功名志薄。又遇猜主。  
故隸事過隱。而善自遣辭。章法奇變。有類楚騷。採桑。綿歎者誰。揚歌何指。代車馬客行。故悲新喜。於事  
曷微。代權歌行。何以歎進退之不由。代白馬篇。何以痛君臣之忘虜。代昇天行。何以堅遯世不回之志。  
代朗月行。何以見士夫無恥之風。代堂上歌。扶風歌。何以慨想中原。中興歌。何以諷刺朝野。又若從拜  
陵之爲葬后。游園山之爲華林。春羈之彭城。講易之隆素士。事隱義晦。如是者。亦不可悉終。注者第求  
典實。無與詩心。隱志不彰。概爲藻語。此其二也。楞仙先生。於千餘年來。舉世不言之鮑詩。毅然爲之作



注。淹博翔實。後學所尊。余以講習之餘。輒求其義。以示諸生。則獲益於錢注者不尠。昔王龜齡注東坡詩。施禮初因其詳略而損益之。或穿穴傍出。佐以別載。余於錢注。不敢有所損益。惟別載則不能無異焉。稿甫脫版。已復有增刪。慨其未逮。以俟他日。癸亥十二月二十二日順德黃節。

鮑譜參考書目

漢書注

晉書

宋書

南齊書

南史

水經注

風土記

元和志

寰宇記

江乘地記

京口記

讀史方輿紀要

鎮江志

韻府

一統志

歷代地理志韻編

通志

隋書經籍志

舊唐書經籍志

新唐書藝文志

宋書藝文志

書錄解題

樂府解題

樂府正義

續世說

侍兒小名錄

詩品

宋子京筆記

潘子真詩話

何義門讀書記

藝概

文選李善五臣注

玉台新詠

名媛詩歸

鮑照年譜

參考書目

七十家賦鈔

顏延之集

本集

汪本張本  
毛校宋本

鮑參軍詩補注

繆鉞鮑明遠年譜